

東
華
續
錄

東華續錄

嘉慶八

臣王先謙敬編

臣周綸蕃恭校

秋七月辛酉諭軍機大臣等倭什布奏各股賊匪共有萬餘人分
路撲卡經各員弁奮勇迎勦自遊擊以至把總陣亡者共有七員
兵丁傷亡者亦多可見堵禦不爲不力總緣楚省邊界兵單寡不
敵眾而川省官兵不能緊蹙追勦予賊以暇以致匪眾闖入非倭
什布之過實勒保之咎也勒保身爲經略川楚陝豫軍務皆應通
盤籌畫今賊匪竄出川省而勒保卽置之不顧如此漫無調度尙
得謂之經略耶勒保著傳旨嚴行申飭並著查明奔竄楚省之李
樹徐添德張起貴宋鏐子四股見在究係何人追勦卽令各帶原
有之兵速赴竹山竹谿幫同倭什布奮力截擊若能殲盡此四股

賊匪則該員等縱令川匪入楚之罪尙可自贖儻再觀望怠玩必
按軍律治罪再前據松筠等奏官兵勦賊爲時已久衣敝履穿並
有用牛皮袋足者朕閱之深爲憐憫軍需動支款項有一定則例
原不許額外濫用但亦不可因例難開銷過事苛刻今從征者前
有鋒鏑之危後有饑寒之困何以使之效命疆場克敵致果耶軍
營一切賞需自應略爲寬裕加之體恤使士馬飽騰人思敵愾而
發揚蹈厲之氣更可壯軍容而寒賊膽果大功速竣卽有例外動
用之項朕自當酌數情節特加恩准○癸亥勒保奏總兵官朱射
斗殲斃賊首包正洪得旨嘉獎賞朱射斗騎都尉世職兵丁一月
錢糧○乙丑諭三法司衙門具題浙江省民人汪應鳳毆傷胞兄
汪應隴身死並聲明救母情切一案經內閣票擬斬決及斬候雙
籤請旨固皆係按例辦理今朕詳閱案情汪應隴因伊母祖護幼

子將應出養贍食穀不給其母並出言頂撞經朱氏褻罵扭結汪應龍輒敢將其母推跌壓住用手揪按胸衣經汪應鳳往拉仍不放手汪應鳳見其母面脹氣塞喊不出聲情急用拳向毆汪應龍移時殞命是汪應龍之蔑倫肆逆殊爲兇橫可惡汪應鳳往拉不放見其母面脹氣塞事在危急用拳向毆實屬出於迫切以情急救母之人斃忤逆不孝之犯固不得以尋常毆死胞兄論卽改擬斬候亦尙覺情節可憫汪應鳳著免死改爲滿流定地發配且聞案內伊母朱氏尙有二子亦不至待養乏人如此準情酌辦庶足以昭平允而示矜恤○改山東曹單同知爲曹河同知專管曹汛隄工曹州府管糧通判爲糧河通判管轄曹下汛及單汛隄工裁河南修武縣縣丞設山東曹單管河縣丞裁河南考城汛千總設曹單協辦守備○丁卯宜興以偏聽屬員濫刑解任以岳起爲江

蘇巡撫全保爲山東布政使完顏岱爲直隸按察使

由河南糧道遷

○撥

安徽江西藩庫銀各五十萬兩備湖北軍需○壬申諭軍機大臣等勒保自任經略以來已及半載於勦辦賊匪機宜總未通盤籌畫惟知安坐達州毫無調度僅將各路軍營所報情形敷衍入奏前據倭什布奏川省賊匪闖入楚省邊界係前月二十四日拜發至今已二十餘日並未據勒保奏及此事茲又據倭什布奏李淑等股賊匪屯聚竹山竹谿房縣交界處所倭什布督率將弁悉力堵禦賊匪直撲副將孫清元營盤意欲北趨襄陽一帶經倭什布派兵堵禦賊匪又復折回乘夜圍撲倭什布營盤被官兵擊退始向西南奔竄而李淑後股賊匪尙屯泉河一帶又有羅半年一股亦接踵入楚爲數不下二萬見經倭什布飛咨勒保速派官兵赴楚協剿可見楚省並無川省派往之兵勒保於事先既未能豫爲

防範縱令羣賊擾及楚境迫賊已入楚又不星速派兵前往會剿並未將如何籌辦派何人前往會剿之處先行馳奏竟置楚省之賊於不問又安用此經略爲耶且見在藍號白號賊匪俱已竄入川北地界亦未聞勒保派兵堵截是勒保竟係擇一無賊處所紮營株守直與木偶無異不料勒保孤負委任一至於此前因官軍勦捕日久恐致疲乏節經詢問勒保應否添調官兵勒保以無庸添兵覆奏復經降旨詳悉開導諭以不可回護前奏致誤事機勒保仍堅執前說不必添兵朕早料其不足倚仗已豫調山西兵三千盛京兵二千前往接濟今楚省之賊多至二萬而倭什布一路官兵不過三千有餘則勒保節次所奏不必添兵之說是誠何心種種玩誤上負 皇考及朕簡川之恩此而不加懲治軍紀安在勒保著革職拏問所有經略事務著明亮接辦並授爲正紅旗漢

軍都統其四川總督員缺著魁倫署理並派乾清門侍衛春甯安福色玉慎傳陞一同馳驛前赴明亮軍營著魁倫親齎此旨前往宣讀明亮接奉此旨將剿辦張漢潮事務交付慶成永保卽同魁倫前赴達州軍營傳旨將勒保革職拏問卽將以上指出各情節嚴訊勒保定擬具奏並查明由大甯闌入楚境之賊本係何人追剿何以並不上緊趕截縱令入楚一經查實卽將此路帶兵之員革職拏問不可稍有瞻徇○乙亥諭軍機大臣等前此入楚各股賊匪不知是川省何兵追躡曾經降旨詢問今閱勒保摺始有七十五德英額呂朝龍三人並派廣東兵九百名在交界堵截之語此節最關緊要若係勒保派往時卽諭令及境而止不必入楚則是勒保惟知有川不知有楚經略之謂何若七十五等三人畏賊退怯竟以翻入老林誑報經略則伊三人之罪更不可追勒保會

否諭令三人入楚協勦亦須明白訊問具奏其另摺覆奏賊匪各色稱號賊黨忽分忽合各立號記而何賊與何股合夥見鼠何地勒保未能深知所查多未確實在勒保之意總欲回護從前不肯添兵之奏故以賊匪股數無多藉詞支飾此猶係勒保捏奏小節至賊匪有減無增之語實屬有心欺罔試思各股賊匪蔓延數省陝省之平利楚省之竹山竹谿房縣到處被賊蹂躪裹脅日多據倭什布奏入楚之賊已二萬人勒保身爲經略各路皆係管轄豈得以川匪竄入楚陝卽謂有減無增耶勒保以此狡詞回護實屬喪心病狂最重之罪實在於此明亮應將此一節會同魁倫向勒保嚴切詢問迅速奏聞又據勒保奏請撥餉銀五百萬兩尤屬荒唐前發去餉銀二百五十萬兩甫經到彼豈一時已全數用去又復請餉五百萬兩全不籌及國計止圖請發多金以爲虛糜侵冒

地步勒保亦自知所請過多故另立賑濟難民名色巧爲蒙混蓋軍需支用有一定則例部中可以按例議駁卽尋常賑濟尙有豫報戶口冊籍可據若投出難民之數任開數十萬名無從覈其多寡是勒保竟欲藉賑濟名色爲將來冒銷之計更屬有心取巧朕素不靳惜帑項曾經降旨以軍營支發兵丁款項總當略爲寬裕儻成功迅速朕必有例外准銷恩旨卽投出難民亦須優加撫恤務使按名俱有歸著毋令一夫失所原爲體恤兵民起見豈可令帶兵之員各肥囊橐乎並著明亮魁倫一體據實嚴查具奏○革景安伯爵發伊犁效力○免甘肅教匪滋擾之隴西等十四州縣西固三岔二州同所屬近賊之皋蘭等四十廳州縣及沙泥州判紅水縣丞所屬新舊額賦並民欠籽種口糧○丁丑諭成親王永理面奏懇辭管理戶部並三庫事務據稱自幼在上書房讀書未

會閱歷度支出納款項繁多恐難兼顧陳請解退部務庶於軍機處承旨書諭諸務得以專心辦理且各部俱無總理之人戶部事亦無庸另設總理等語成親王永理自總理戶部以來敬事奉公盡心綜覈卽應得捐項飯銀亦不行支領所管三庫均能稽察弊端茲因兼攝職任較繁懇辭再四具見謙抑之懷著俯允所請永理不必總理戶部其戶部三庫事務著另派那彥成管理所有永理定立章程至爲詳妥仍著戶部堂官及那彥成等遵循辦理○辛巳諭各省呈進方物原以備賞賚之需見在二十七月之內萬壽聖節並不舉行筵宴無須頒賞所有各督撫及鹽政關差織造應進方物槩行停止呈進若中秋節令外閒不過以瓜餅食物酬酢往來內廷並無宴賚之例尤非萬壽及端陽歲除可比嗣後中秋節貢著永遠停止○轉明安爲工部左侍郎以西成爲工部右

侍郎

由太常寺卿遷

○壬午諭軍機大臣等此次張漢潮竄至竹林關與

豫楚兩省交界相隔均二百餘里明亮等既在川陝楚三省交界屯紮賊匪若竄至鄖陽一帶即可迎頭截殺如直趨商雒一帶逼近豫省尤當繞前奮擊儻賊匪仍折向南山等處則有慶成永保自西而東正可趁勢迎剿其時此股賊匪可專交伊二人剿辦明亮與興肇卽帶兵就近取道鄖西速赴竹山竹谿幫同倭什布速剿李淑徐添德等股倭什布處賊眾兵單待援甚急前添調山西官兵諒可陸續趕到明亮即可全行帶領赴楚○江南碭汛那家壩河溢○甲申撥山西藩庫銀四十萬兩備四川軍需○述德以年老降補內務府司員調張師誠爲江蘇按察使完顏岱爲河南按察使以同興爲直隸按察使

由長蘆鹽運使遷

八月戊子諭昨有湖南廣西候補吏目二人徑至乾清門呈遞奏

摺經奏事處官員駁斥未接仍行據實具奏自以不接爲是此時當廣開言路明目達聰原俾下情無不上達但朝廷設官分職有一定階級等差應否自遞奏章皆係體制所關不容淆混是以降旨封奏者外省自道員以上豈有越分至不應至之地濫行呈奏之理耶況此等人員如果於內外利弊確有所見或別含冤抑急欲訴呈原准其在各衙門封遞直達朕前並不至於壅蔽若不論何項人員皆紛紛赴宮門遞摺尙復成何政體此皆由門禁不嚴該管大小官員因循怠玩不能留意稽查以致外省候補微員徑赴宮門覬越呈遞嗣後禁城內各門出入人員著前鋒統領護軍統領各率所屬之章京等認真稽查按照舊例行走如再有似此越分遞摺之事必將該管大小官員治罪○癸巳富綱丁母憂以

長麟爲雲貴總督

由喀什噶爾參贊大臣遷

○甲午免調派盛京吉林黑龍江

兵丁經過州縣額賦直隸自山海關至磁州十分之三河南至湖北十分之五○乙未勒保奏德楞泰生擒首逆龔文玉賞德楞泰騎都尉世職兵丁一月錢糧○丙申諭兵部議處違例呈進土貢之福州將軍慶霖請照違制例革職一摺各省呈進貢物節經降旨嚴行飭禁見屆八月十三日爲 皇考萬萬壽誕辰朕旣不能奉觴稱慶而明歲 九旬萬萬壽又不獲躬率天下臣民祝嘏臚歡用申孝養每瞻 靈几哀慕方深今慶霖乃循照年例呈進土貢益令朕觸緒增悲殊屬冒昧卽照部議以違制例革職實爲罪所應得姑念慶霖由侍衛出身擢任將軍心地糊塗於體制不能諳悉且因兼管閩海關務所進止係土物又屬初次著從寬改爲革職留任惟是此次慶霖得邀寬宥或外間無識之人妄意前此飭禁雖奉有明諭而違例呈進其革職處分仍可邀恩留任又

視爲具文遂思僥倖嘗試冀開進奉之門此則有意測探大非朕
此次施恩之意矣從前進貢一事 皇考亦屢經頒諭嚴禁而督
撫等仍罔有備物呈遞者 皇考因其既經備進或賞收一二件
藉聯上下之情然亦甚以爲可厭今朕志先定斷不容臣工等有
陽奉陰違之事朕在藩邸時一切服御起居槩從簡樸而親政後
大以崇儉黜華冀厚民生而敦撓俗見在宮禁之中所貯珍寶玩
品極爲充牣飢不可食寒不可衣可見此等珍奇止屬無用之物
況外省備進貢物名爲奉上其實藉以營私每次未收之件既可
分餽權要又可歸入私囊而屬員等競事逢迎輒以幫貢爲詞藉
端派累層層巧取以致小民疲削難堪大抵進奉一節最爲吏治
之害此朕所深悉弊端而必加嚴禁者也此次朕之所以寬恕慶
霖者實因伊係武職糊塗所進止係方物其咎不過冒昧尙非欲

倡爲此舉首先嘗試是以姑免革職傷臣工等誤會朕意欲藉此營私見好仍冀得免嚴議則是有意效尤不但照違制例革職必當重治其罪決不姑寬朕如此披誠訓諭而內外臣工多有不能深信朕者必欲陷朕以好貨之名快其私憤便其私圖雖係以小人之腹度君子之心不足與較然朕之苦衷亦不可不宣示也至慶桂在京供職相距伊弟任所較遠慶霖呈進不合之處未經阻止其咎尙輕著照部議查級准抵免其降調將此通諭知之○免貴州苗匪滋擾之興義府屬額糧○丁酉撥內庫銀四十萬兩備河南軍需○戊戌倭什布奏勦捕湖北歇馬河竄匪賞雲騎尉世職兵丁一月錢糧○辛丑陳用敷以疾乞休允之以荆道乾爲安徽巡撫方昂爲江蘇布政使成甯爲貴州按察使

由湖南辰沅永靖道遷

○

癸卯諭軍機大臣等昨據廣興奉聞明亮會說從前在金川時伊

與溫福一同帶兵今受伊子勒保節制心實不願若即將張漢潮一股剿盡必須前往四川聽候勒保調度莫若留張漢潮在陝任其往來奔竄藉追剿爲名免致赴川且得專摺奏事又聞永保在留壩華林山地方遇見賊匪永保所帶之兵雖有二千皆係疲乏有將官穆克登布再三阻止不可與賊打仗永保說受主恩深厚既遇賊匪豈有不竭力截殺之理彼時賊匪見官兵在半山駐紮卽在山下向上攻撲又另分一股從閒道上山下壓以致官兵被賊匪上下夾攻勢甚危急幸有馬兆瑞帶兵五百名前來衝擊賊匪見有接應始行散去嗣明亮前來會晤永保責備明亮以華林山打仗時明亮在廢邱關駐紮相隔止七十里何以不帶兵前來救援明亮又責備永保冒昧打仗損折兵將與伊無涉永保要參明亮頓兵不救明亮要參永保敗衄失事彼此大加爭鬧又明亮

至鳳縣時賊匪向北奔竄明亮轉帶兵向南行走聲言繞道迎截其時慶成到彼與永保合兵未赴明亮一路等語朕又聞從前張漢潮會遇乏食向村莊內投尋並無可掠止覓得桐油卽與賊匪分食充飢遂卽嘔吐困頓經兵勇探知報明帶兵大員而明亮與肇並不往捕又張漢潮會與賊匪在村莊酣飲卧地經兵勇報知領兵大員亦不迅往擒拏旋被逃脫以上各情節如果屬實則明亮慶成永保竟係挾私縱賊有心玩寇無怪乎意見之不和也著魁倫秉公確查據實具奏不可稍有徇隱又本日祖之望到京據稱湖北辦理軍需查出胡齊嵩經手帳簿多係開載領兵大臣犒賞提用及督撫與該道餽送領兵官員款項如明亮慶成永保恆瑞德楊泰舒亮等皆曾得過惟額勒登保一人未經得受是軍興以來所發餉銀七千餘萬竟爲伊等餽送侵肥花消之用湖北一

省經手軍需爲數尙少已有如此弊端何況四川支發軍餉不啻數倍於楚且胡齊崙僅係道員輒以公帑作爲餽送見情何況福甯職分較大總辦糧務如勒保明亮及在營帶兵官員豈有不任意提用作爲餽送藉資結納之理卽如福甯從前曾經致送和珅銀兩朕所深知此時朝中雖無權要有須餽賂之人而督撫等或藉犒賞爲名私行提用自肥已稟皆所不免試思國家經費有常今以七千餘萬之帑一任伊等揮霍全不以軍務爲重則賊匪何由得平伊等之意總不過欲藉辦理軍務屢請多發餉銀可以浮冒開銷爲補從前虧缺地步是以有意遷延總不欲剋辦完竣誠恐軍營蕘事則平時虧空悉行破露無可彌縫此實外省積弊最爲可恨今特交魁倫將福甯經手軍需嚴行查覈其平日如何侵用餉銀致送何人並各路帶兵大員如何藉詞犒賞提用若干之

處一一詳細查究若得實據卽行鎖拏速卽具奏卽如明亮剿辦賊匪爲日已久乃挾私養寇惟事尾追甚至賊匪經過營前必可就擒而縱令逸去殊出情理之外且領兵諸大員雖承受朕恩日淺而仰蒙 皇考厚恩至爲優渥縱欲養寇自便獨不思速蕝軍務得以及早來京叩謁 山陵乎如明亮實有提用餉銀及得受福甯餽送情事魁倫必當據實舉劾不可以此事一經實奏恐形迹之間似欲排擠明亮圖爲經略因而有所瞻顧不實不盡今特明諭魁倫卽使明亮被參後朕亦斷不將魁倫授爲經略魁倫見署四川總督儻兼任經略勢必紮營駐兵不能遠涉則與勒保何異若帶兵四出越境剿賊則川省地方應辦之事及本境賊匪又安能兼顧乎見在各路帶兵大員惟額勒登保最爲出力卽以胡齊崙餽送而諭亦惟額勒登保獨無沾染不特軍營人員眾口稱

讚卽在京滿漢各員無不重其爲人可見額勒登保忠勇清公實
爲難得經略之任舍伊誰屬卽額勒登保不識漢字亦何難以清
字繕奏朕亦降清字諭旨指示耶魁倫竟不必存避嫌之見爲明
亮等容隱惟當據實詳查若得有受賄確據贓數逾貫罪應至死
者卽應一面嚴參一面傳旨拏問又據吳熊光奏豫省挑補兵丁
不但鄉勇等不願入伍卽兵丁子弟過其父兄缺出亦不肯卽行
充補前令各省招募兵丁原以鄉勇民人旣得口糧養贍又上進
有階自必踴躍從事今乃視爲畏途退避不前此皆由帶兵官員
不知體恤任其襁褓凍餓甚至以牛皮裹足亦全不爲意其有赴
義捐軀者無論兵丁鄉勇俱不肯按名咨卹何怪乎鄉勇之不願
入伍食糧兵丁子弟亦不願報充營缺耶要之國帑運至軍營總
不肯公平散給諸將意中本無平賊之心惟知罔利營私故於兵

丁等全不加之軫恤安能得其心而用其力魁倫不可不痛懲積習大加振作以期迅奏膚功仰慰 皇考在天之靈毋負朕諄切誥誡至意又諭頃降旨後朕復思從前令魁倫赴川先至達州傳旨將勒保革職摺問卽將所齎諭旨一道並經略印信俱交額勒登保帶領兵丁齎赴湖北明亮軍營今廣興來京覆命奏及明亮不甘爲勒保之下有心玩誤實屬可恨豈可復膺經略重任卽使拏獲張漢潮亦難自贖見已降旨授額勒登保爲經略魁倫前抵達州傳旨革摺勒保後卽以經略印信交額勒登保祇領帶去之荷包亦卽賞給額勒登保以示獎勵所有帶給明亮諭旨一併付給閱看至川省軍營人員營私牟利交結應酬上下一氣交通舞弊而兵丁糧餉轉不能卽時給發魁倫所奏種種弊竇與朕所聞相同著魁倫卽向勒保嚴切訊問務得實情福甯係總辦糧務大

員經手軍需其通同侵蝕必有甚於胡齊崙者並著魁倫調齊底帳將收支細數悉心查覈若得使用帑項儘送入己實據即傳旨將福甯一面革職鎖拏一面奏聞候朕嚴訊魁倫到川後第一緊要之事係審訊勒保其次卽嚴查福甯經手餉銀此二事特交魁倫專辦○賞參贊大臣額勒登保都統銜爲經略大臣撥內庫銀二百萬兩命副都御史廣興副都統托津押送四川達州以備軍需○乙巳諭今年正月初八日朕所以將和珅福長安拏問治罪者因伊二人同受 皇考厚恩多年不思感激報效朋比爲奸獲罪甚重不得不治以國法非朕初親政務卽將 皇考左右常侍之大臣遽加罪譴也但伊二人中和珅種種不法已極又經科道劾參情節重大斷無一綫生路是以於十八日卽賜令自盡而福長安雖未經人指款參奏然與和珅同爲軍機大臣勢位相等而

甘心阿附不自樹立且自嘉慶元年以來朕時時命伊召見且朕
恭謁 泰陵伊獨隨行於沿途行宮每日召見數次並微示以意
冀其將和珅平日所爲直陳無隱福長安始終諱飾無一語道及
和珅者是其昧心喪良自甘比黨甚爲可恨故特命拏究乃出自
朕意非由他人舉發也大學士九卿等議以斬決後又從寬改爲
監候即使福長安捫心自問尙得謂非情眞罪當乎若定擬以後
有續將伊別項劣蹟指劾者自仍按罪究辦亦無偏縱之理今自
監禁以來已逾半載以伊擬斬之人誰復畏其勢燄而竟別無論
及之者是福長安居官行事雖非無可指摘然與和珅之罪狀多
端爲舉朝痛恨者則有閒矣今朝審已過讞典具成因念福長安
蒙 皇考養二十餘年即使伊冥頑不靈不念 恩遇而朕方
當觸目成哀之時卽當年 御用器物犬馬猶不忍棄置况如福

長安之稍有趨走微勞譬如小犬之曾蒙馴飼禁中者乎今屆奉
移山陵之期福長安稍有人心自必以身獲重罪不能叩送
梓宮痛心涕泣深自愧悔縱伊無此心而朕心究竟有所不忍福
長安著加恩釋放伊平日在皇考前常有捧茶之職事今著前
往裕陵永遠充供茶拜唐阿俾其敬依陵寢咸念皇考深
恩時加內省且伊父傅恆墳塋亦在附近地方福長安並可追思
伊父從前克承眷注永保令名將必撫衷自問於爲臣爲子之
道今竟何如耶伊子雲騎尉錫麟亦著隨往交與縣億等派給差
使福長安著於釋放後給假十日以便接收賞還查鈔物件向來
臣工有以食墨獲罪者例將家產籍沒入官總視其獲罪之重輕
而不計其貲財之豐蓄卽如賊私狼藉家產優厚從未有如和坤
者然春閒查鈔之後除違制之物如正珠朝珠圭式案之類原不

可以頒賜臣工其餘若章服什物俱各視王公文武大臣以及御前乾清門侍衛等品級職分應用者悉行分賜下至宮中內監亦無不徧邀賞賚而留賜和孝公主者更不可勝計惟零星破舊物件始交崇文門變價所值無幾此人所共知也至福長安鈔入物件內有伊備辦 皇考九旬萬萬壽及朕四旬萬壽呈進者自不必復行賞還今將餘物槩行分日賞給朕於福長安罪名已定時即將今日所賞之物令總管太監等另爲存記則朕於 皇考時服侍舊人苟可矜全必無置之重典與夫事遵國法初不計較財貨之意可取著於中外大小臣工矣所有辦理此事始末特行通諭中外知之○勒保奏生擒首逆卜三聘並各逆家屬○丙午諭據劉權之奏買補倉穀宜赴鄰邑採辦以免派累一摺所奏自屬可行採買倉穀向來原有定例今據劉權之奏地方官奉行不實

往往藉端肥橐輒在本地派買不論市價貴賤止發銀四五錢不
等並勒令出具照時價領票兼之差役需索使費以致領票花戶
皆不願上納穀石惟求繳還原封銀兩另外加倍繳價較交穀猶
爲省事甚至有力富戶賄屬書吏將本名下之穀飛遞零星有田
之戶富戶轉得少領竟致完善良民衣食難周深受採買之累地
方官止圖折價入己遇當平糶之年仍無存貯之米一旦協濟鄰
省則著米鋪倉卒購辦照時價尤有剋扣及起運收米押運之家
人胥役又向鋪戶百端勒捐等語種種弊端實所不免特此通諭
各督撫嗣後遇應行買補倉穀年分務須飭令所屬在豐稔鄰縣
按照時價公平採辦不許向本地派買並將向來吏胥等串通舞
弊積習嚴行查禁隨案重懲以期倉穀皆歸實貯小民不至擾累
至社倉原係本地殷實之戶好義捐輸以備借給貧民之用近來

官爲經理大半藉端那移日久並不歸款設有存餘管理之首士與胥吏亦得從中盜竄備遇儉歲顆粒全無以致殷實之戶不樂捐輸老成之首士不願承辦是向來良法徒爲官吏侵肥亦應一律查禁並著各督撫等將各省社倉仍聽本地殷實富戶擇其謹厚者自行辦理不必官吏經手以杜弊竇而裕民食各督撫務須董飭所屬實力奉行如有前項弊端卽行據實參奏儻仍視爲具文復蹈前轍一經訪問或被科道參奏必將該督撫重治其罪將此通諭知之○定各省刑具式有私創及非法濫用者罪之○戊申以萬甯爲太常寺卿廣厚爲江西布政使姜開陽爲甘肅按察使由鹽道遷○己酉諭慶成永保與明亮同在陝省勦辦張漢潮一股賊匪理宜同心協力以國事爲重上緊殺賊俾陝境早就肅清方爲不負任使乃半載有餘尙未蒞事節據奏報勦賊情形總未見

伊三人會同夾擊明亮之摺則稱見在直前追剿若遇慶成永保帶兵前來即可合圍奮擊而慶成永保之摺又稱想明亮追躡前來即可併力合剿彼此各用揣度之詞互相推諉每隔旬餘卽如此奏報一次塞責近日甚至彼此不通信息伊等意見不和忌功樹黨朕早經洞鑒節次降旨嚴飭並令松筠密行查奏昨據松筠奏賊匪於八月初一日竄至商州楊家斜地方明亮於是日追抵商州慶成永保卽折回西北鈔擊及明亮追賊至藍田慶成永保又趕往北面等語伊二人已明知明亮趕至商州正應會商會剿乃轉行折回是直欲避明亮不與相見張逆得延殘喘皆由二人不迎頭攔截之故松筠摺內稱慶成永保於十六日至鎮安之舊縣關紮營直至二十二日始至該縣東五里之舊司駐紮此數日內慶成永保究竟日行幾里其罪已無可辭本日巳時先據慶成

永保奏鈔截張漢潮趕至五郎邊界一摺內稱賊匪有分出落後一股恐其乘隙北竄永保卽於大三岔一帶要路地方暫停等語此仍不過託詞躲避明亮豫爲諉卸地步而慶成由鎮安五郎鈔向西北又稱山險不能繞出賊前令綸布春等帶領馬隊前行慶成惟在後督催並稱連日陰雨山水汙漲趕至洵陽壩地方僅斃數十名而夥匪又折向東南鎮安復因兵丁衣履泥溼在彼收拾是慶成亦惟託故遷延並不跟蹤追勦而伊二人摺內竟未提及明亮一字尤出情理之外午時旋據明亮奏到痛勦張漢潮賊眾偏向西南逃竄一摺訊據獲賊供稱有兩日行三百餘里並無官兵追趕之語摺內又稱自鄖陽鄖西緊蹙賊蹤趕向商州今又追至鎮安境內慶成永保等帶兵六千餘名總未見面是慶成永保本日奏到之摺竟係畏懼明亮參劾有心捏飾似此懷挾私見坐

誤事機全不顧勦賊重務慶成永保可謂喪盡天良若不嚴行懲治何以肅軍紀而勵戎行且張漢潮以一老病無能之賊又身受槍傷陝省見在並無他股賊匪若不趁此時廓清陝境一任伊等耽延貽誤何時方能勦淨茲特命工部尙書那彥成以欽差大臣前往督同明亮勦辦張漢潮一股賊匪以期迅速集事卽著那彥成齎朕諭旨先於慶成永保軍營將伊二人傳旨革職拏問一面向慶成永保嚴訊將伊二人玩誤實情先行具奏再交與松筠定擬具奏那彥成卽帶領慶成永保原帶之兵與明亮會商勦辦務將張漢潮一股首夥悉數殲除不留餘孽所有陝西巡撫員缺著馬慧裕暫行署理其成都將軍員缺候朕另行簡放○張端城以母老乞改京職允之以公裁爲雲南按察使由直隸天津道遷○庚戌命東省漕糧仍照舊例冬兌春開○辛亥革翰林院編修洪亮吉職

命軍機大臣會同刑部審訊○壬子諭據朱珪劉權之奏伊等未
將洪亮吉投遞原書並詩句進呈自請交部嚴加議處各摺洪亮
吉書詞荒唐朱珪劉權之既經拆閱自應卽時呈進乃經奉旨查
訊始行交出此等書詞若係滿洲人員投遞伊等未必不卽時呈
出可見朱珪劉權之均不免因自由翰林出身意存回護惟念朱
珪平日人品端正劉權之節次陳奏之事尙能切實敷陳伊等所
請嚴加議處之處著加恩改爲交都察院吏部議處尋議降三級
調用得旨改爲降三級留任○申諭各督撫整飭營伍○調台布
爲陝西巡撫以謝啓昆爲廣西巡撫劉斌爲浙江布政使瞻柱爲
福建按察使由直隸清河道遷○癸丑諭本年正月朕親政之初卽特頒
諭旨廣開言路原欲內外臣工各抒所見指陳利弊以收兼聽並
觀之效不特事關國計民生彈劾官吏俱當直言無隱卽朕用人

行政有能規諫者如果敷陳得當朕必虛心採納特加獎擢以風勵有位而半載有餘條陳政務摺奏尙不乏人從未有匡及朕躬者朕方時深虔惕不敢稍存滿假之念昨軍機大臣等將洪亮吉呈遞成親王書札進覽語涉不經全無倫次洪亮吉身係編修且曾在上書房行走若有條奏事件原可自具封章直達朕前或交掌院及伊素識之大臣代奏亦無不可乃洪亮吉輒作私書呈遞成親王處並稱有分致朱珪劉權之二書因命一併呈閱書內所稱如先法 憲皇帝之嚴明後法 仁皇帝之寬仁等語洪亮吉以小臣妄測 高深意存軒輊狂謬已極又稱三四月以來視朝稍晏恐有俳優近習熒惑聖聽等語朕孜孜圖治每日召見臣工披閱章奏視朝時刻之常規及官府整肅之實事在廷諸臣皆所共知不值因洪亮吉之語細爲剖白若洪亮吉以此等語言手疏

陳奏卽荒誕有甚於此者朕必不加之罪實更當加以自省引爲
良規今以無稽之言向各處投札是誠何心設成親王等不將各
札進呈轉似實有其事代爲隱諱矣且俳優近習究係何人必有
所指先命軍機大臣向伊訊問則毫無指據此外所供各款亦多
出自臆度爰允軍機大臣等所請將洪亮吉革職交軍機大臣會
同刑部審訊而洪亮吉惟自認一時糊塗信筆混寫是何言耶又
書內所稱諂事和珅諸人如孫士毅寶光鼐李綬等早經物故吳
省欽則業經罷斥蔣賜棨韓鐸雖尙列朝籍已不復嚮用此外若
吳省蘭胡長齡汪滋畹等與和珅交涉之處皆朕所素知春間將
和珅定讞時已明降諭旨凡依附和珅者槩不必株連豈有因洪
亮吉一言復行追究之理又如楊天相一案朕早有所聞特交費
淳等確查並無冤枉的據若果有屈抑則案內參革治罪之陳大

用及見在監禁之林朝相沈春發等豈無一言申訴何待洪亮吉爲之嘵嘵不平乎又如秦承恩關閉城門不納難民等事屢經審訊並詢之陝省文武諸臣實無其事是以加恩釋放給還鈔產惠齡則因其曾經屢獲首逆降補侍郎皆有明旨宣示此等貽誤地方之員亦必罪至於死方可加之重典卽如顯肆謗訕之洪亮吉尙不肯遽抵於法況封疆大臣焉有罪狀未明輒寘之重辟乎此外羅列貪黷諸人及向軍機章京章煦求認師生等事據供皆得自傳聞漫無確據更無庸一一根究矣至洪亮吉肆意妄言有心誹謗經軍機大臣會同刑部照大不敬律擬以斬決實屬罪由自取但朕方冀聞謏論豈轉以言語罪人亦斷不肯爲誅戮言臣自蔽耳目之庸主今因伊言惟自省於心有則改之無則加勉而已洪亮吉平日耽酒狂縱放蕩禮法之外儒風士品埽地無餘其訕

上無禮雖非諫諍之臣可比亦豈肯科以死罪俾伊竊取直名致無識者流妄謂朕誅戮言事之人乎惟近日風氣往往好爲議論造作無根之談或見諸詩文自負通品此則人心士習所關不可不示以懲戒豈可以本朝極盛之時而輒蹈明末聲氣陋習哉洪亮吉著從寬免死發往伊犁交與將軍保甯嚴行管束至原書三件除成親王呈進者留以備覽雖所陳係毫無影響之事朕必不因此含怒以干太和之氣而阻敢言之風且可隨時披閱藉以爲始勤終怠之儆其呈遞朱珪劉權之二書仍著發還聽其或留或毀可也所有辦理此案始末特行通諭中外臣工知之○甲寅諭向來各省民人赴都察院步軍統領衙門呈控案件該衙門有具摺奏聞者有咨回各該省督撫審辦者亦有徑行駁斥者辦理之法有三似此則伊等准駁竟可意爲高下見當廣開言路明目達

聰原俾下情無不上達若將具控之案擅自駁斥設遇有控告該省督撫貪黷不職及關涉權要等事或瞻顧情面壓隔不辦恐啓賄屬消弭之漸所關非小嗣後都察院步軍統領衙門遇有各省呈控之案俱不准駁斥其案情較重者自應卽行具奏卽有應咨回本省審辦之案亦應於一月或兩月視控案之多寡彙奏一次並將各案情節於摺內分晰註明候朕披閱儻有案情較重不卽具奏僅咨回本省辦理者經朕看出必將各堂官交部嚴加議處著爲令○蔣兆奎請各直省有漕州縣每石加徵米一斗津貼旗丁上不許

九月丁巳 高宗純皇帝梓宮發引 上恭送往 裕陵啓鑾○戊午以江南洪澤湖決命截留徐州屬七州縣漕糧備賑○己未定伊犁駐防兵婦守節已屆年限照內地旌表例○庚申再免經

過地方明年額賦十分之三○辛酉 上謁 昭西陵 孝陵

孝東陵 景陵至 裕陵詣 隆恩殿恭奉 冊寶上 孝賢純

皇后尊諡曰 孝賢誠正敦穆仁惠輔天昌聖純皇后 孝儀純

皇后尊諡曰 孝儀恭順康裕慈仁翼天毓聖純皇后○壬戌

高宗純皇帝梓宮至 裕陵暫安於 享殿○加工部尚書彭元

瑞太子太保禮部尚書德明太子少保○以阿迪斯爲成都將軍

達椿爲左都御史調鐵保爲吏部右侍郎瑚圖禮爲盛京刑部侍

郎以成書爲盛京兵部侍郎由內閣學士遷○甲子諭軍機大臣等張漢

潮大股賊匪經明亮等分路偪勦卽折向茅平一帶逃竄是賊勢

已感明亮趕抵江河而張漢潮已由焦溪河西竄若永保慶成能

在彼堵住自行就獲乃總未夾擊一次見據明亮奏稱永保慶成

駐紮地方未得扼要言外之意自以伊二人竟在無賊處所躲避

且稱慶成已至四畝地追剿永保於八月駐紮大山岔至今未動
豈非有心貽誤故縱張逆昨據松筠查奏永保七月間移營每日
不過二三十里不等已屬玩誤而自駐紮大山岔後又株守二十
餘日實出情理之外著交那彥成會同松筠確查嚴訊卽按軍律
定擬慶成坐失機宜罪無可追惟從前剿賊曾受重傷亦著那彥
成松筠切實嚴訊並查四畝地追賊之事是否確實一併具奏至
明亮奏稱居心行事以阿桂爲則試問明亮若能效阿桂之清何
至到處勒索若能效阿桂之勇何至乘驕避賊此等詭辨何所用
之今那彥成係阿桂之孫明亮若心存輕視則非和衷共事之道
但又不可將軍情重務諉之那彥成一人自圖卸責須幫同勦辦
速將張漢潮拏獲若再不知奮勉則永保卽前車之鑒也○丙寅
諭軍機大臣等松筠奏明亮素稱知兵此次勦辦張逆所言似合

機宜其實罔有成效恆瑞前在湖北頗知奮勉又將藍白二號賊匪兜剿肅清甘境近日稍不如前因年力漸衰之故所奏俱是至其稱額勒登保勇而且廉德榜泰打仗奮勇評論得當不虛延訪惟所奏向書那彥成來陝督辦已經札商酌定適中之地駐紮並令各路彙報軍情一節非朕本意朕所以特派那彥成前往者原令督同明亮剿辦張漢潮一股賊匪那彥成到彼應相機辦理若張漢潮果竄入棧道並當與明亮入川追剿受額勒登保節制是那彥成當以剿賊爲重安有在適中地方駐紮彙報各路情形之理又據奏軍營借支一項由於畢沅不爲經遠之計務從豐厚習久成式所奏自屬實情其畢沅從前浮濫之處將來自另行覈辦也○怡親王永琅薨遣貝子奕純回京帶領侍衛十員奠茶酒以孫奕勳襲爵○戊辰轉普福爲理藩院左侍郎以貢楚克扎布爲

理藩院右侍郎

由喀爾巴哈台參贊大臣題

○庚午大葬

高宗純皇帝於

裕陵○加慶桂董誥太子太傅

○辛未

上回鑾

○癸酉

上還

京師○諭軍機大臣等那彥成奏稱如有失誤軍機情真罪當者

大員嚴參治罪將弁以下一面奏聞以軍法從事等語軍營疲玩

積習自當力爲整頓以期整肅一新若兵丁等有干紀律原應卽

時懲辦至將弁以下必當按罪詳覈方可置之重典卽如永保延

玩避賊已屬確鑿何難卽辦而朕猶必交那彥成等審擬又如已

革副將富成遊擊尤漢玉俱因勦賊不力拏問審明後因有一稜

可原未予重辟此朕於整飭軍紀之中仍寓明慎欽恤之意那彥

成當仰體朕懷慎重辦理且本朝經略大臣亦從無先斬後奏之

事况欽差乎蓋人命至重萬一罪狀未確所關匪細此正朕愛惜

那彥成處那彥成當倍加詳慎如查有實係失誤軍機者卽微末

員弁俱按律定擬候旨遵行豈得自行專擅耶○甲戌 恭奉

高宗純皇帝 孝賢純皇后 孝儀純皇后升祔 太廟頒詔天

下覃恩有差○乙亥諭軍機大臣等倭什布奏將楚省竄匪剿逐

出境湖北肅清倭什布係守土之臣固以楚省肅清爲幸而自朕

視之陝楚何分畛域三年以來各省皆自顧疆域以逐出爲邀功

從不肯實力痛剿前此倭什布具奏安設楚省各邊界卡座繪圖

進呈當諭令盡心防禦乃未及月餘而李淑辛聰等先後闌入豈

非有名無實此次將賊匪驅入陝境尙不足抵疏防之咎若再任

辛聰等復行折回必當併前罪治之又李淑已被槍傷身死倭什

布因無據未敢遽信所奏尙是李淑係大股首逆著細查覆奏○

丙子奉安 高宗純皇帝 孝賢純皇后 孝儀純皇后御容於
壽皇殿○戊寅諭據軍機大臣呈進河南偃師縣民人楊道純

所遞策表朕詳加披閱內稱內惡已誅外弊當除蘇民困以固國
本民心安而賊可滅安民先除積弊倉庫漕糧實國之本而弊之
大者懇請降旨嚴行飭禁務遵定例切實妥辦等語楊道純以民
人而條陳事件不特並無違礙所言皆係地方應辦之事且於摺
奏體制亦俱符合所陳各項今次第舉行如果內外臣工所言皆
能切當豈不甚善楊道純深有合於庶人傳語之義著加恩以從
九品未入流交與直隸總督胡季堂差遣委用遇有缺出再行咨
補○調曹城爲禮部右侍郎轉江蘭爲兵部左侍郎調劉秉恬爲
兵部右侍郎鄒炳泰爲倉場侍郎出禮部右侍郎調○己卯諭朕閱安徽
省情實人犯招冊陳用敷具題緩決經刑部改入情實者共有九
案覈其情節該犯等或因金刃傷多斃命或強奪良家妻女姦占
爲妻或活埋堂弟以及毆斃老人幼孩等事俱係逞忿淫兇例應

情實子句之犯乃陳用敷皆擬爲緩決辦理實屬錯誤推陳用敷之意因伊春閒審擬陳卿廷撞騙關餉一案請旨卽行正法經朕降旨飭諭並令該撫覆覈時將該犯仍照本律擬絞監候又因本年有人條奏請免失出處分經部議准陳用敷遂爾心存揣度謂朕意在從寬輒將秋審應行情實之犯不問情節輕重槩擬緩決以致刑部駁改九案之多殊不知陳卿廷一案本律止應絞候陳用敷於律外加重是以降旨改正此案入於情實將來自應予句仍係按律辦理並非有意從寬也朕自親政以來節次飭諭問刑衙門不得擅用雖但字據及例外援引從重之條蓋以原情定律務協情法之平豈可稍存軒輊若因有前旨而督撫等辦理刑名偏於寬厚豈非誤會朕意乎大清律例皆我 祖 宗執中定憲法守所昭朕惟有謹率舊章不敢稍參己意督撫等何得以窺測

之私於律外有所增減夫世俗以有意從寬故出人死罪爲好善
陰功者皆鄙陋不通之見斷不可以例爰書若將本應抵償之犯
槩從寬縱則死者甯不含冤於地下耶所謂生人而當謂之仁殺
人而當亦謂之仁也嗣後各督撫等問擬罪名總當按律定讞不
得豫存從寬從重之見用昭平允陳用敷及臬司福慶辦理秋審
失出多至九案仍著交部議處陳用敷見已告病回籍俟病痊補
官日再行降旨○庚辰諭昨據倭什布奏胡齊崙動用軍需案內
將底帳進呈此內各路軍營任意提用及督撫支取餽送者款項
累繁實堪駭異夫軍需之設爲養兵以平賊平賊以安民今自勦
辦賊匪以來部發帑銀多至七千餘萬而各省協濟銀兩尙不在
此數如果實用實銷則兵精餉足士氣奮揚早應撲滅賊匪何至
兵丁衣服藍縷幾同乞丐經年累月迄未成功是節年所發帑金

竟徒爲伊等觔法營私之用而於兵丁全不體恤又何怪師老兵
疲士不用命耶見於底帳中查出永保提用尤多慶成數亦不少
見已將永保慶成家產查鈔著將清單發交那彥成松筠按款嚴
訊計贓定罪毋得稍有其實不盡○諭湖北支用軍需爲數尙少
已有如此弊端何況川省軍需不啻數倍且胡齊崙止係道員又
況川省辦理軍需之宜縣英善福甯等經手日久豈有不濫行提
用餽送結納之理不可不切實嚴究計此時廣興已可到彼著傳
諭魁倫卽將福甯解任質審其糧餉事務交廣興接辦福甯如能
自行供明呈送底帳並將宜縣英善從前在任時底帳和盤托出
罪尙可寬儉飾詞含混一經察出伊能當此重罪乎○額勒登保
奏襲賊首阮正澂得旨獎賚授正白旗漢軍都統出力員弁升賞
有差○撥部庫銀一百萬兩備陝西軍需○辛巳諭從前畢沅身

任湖廣總督不能實力整頓貽誤地方以致教匪潛謀勾結乘閒滋事畢沅又不能督飭所屬迅速剿除迄今匪徒蔓延川陝等省日久尙未撲滅皆由畢沅於教匪起事之初辦理不善其罪甚重昨又據倭什布查奏胡齊嵩經手動用軍需底帳畢沅提用銀兩及餽送領兵各大員銀數過多卽如永保解交刑部後畢沅寄送銀兩又復幫助恆秀贖罪等事是畢沅既經貽誤地方復將軍需帑項任意濫支結交餽送飢法營私莫此爲甚若畢沅尙在必當重治其罪今雖已身故豈可復令其子孫仍任官職所有承襲畢沅輕車都尉世職之長孫畢蘭慶及承廕畢沅廕生之次子畢嵩珠俱著革去不准承襲○壬午諭向來每歲舉行祈穀典禮俱由禮部等衙門隔年豫行奏聞明歲庚申正月初八日上辛應行祈穀大祀係在立春之前所有致祭日期業於昨歲奏明 高

宗純皇帝自當屆期舉行不敢議改惟朕思禮經所載孟春祈穀原爲本年歲事豫兆農祥若在立春以前舉行於乘陽之義未爲精當因檢查大清會典文獻通考書內載康熙五十四年欽奉

諭旨以次年正月初十日雖係上辛尙未立春從前亦有於次辛下辛致祭之時交大學士會同太常寺議奏旋經議准於下辛行禮又雍正十二年亦以次年正月十二日立春初十日應行恭祀祈穀壇欽奉 諭旨以祈穀乃新春典禮似不應在立春以前交該部會同定議亦改期次辛並請嗣後每年 祈穀均在立春後上辛日舉行又乾隆十五年二十九年俱因次年上辛在立春以前改用次辛又四十六年禮部具題次年 祈穀日期改用次辛欽奉 諭旨朕御極以來遇正月初三日以前上辛因必須隔年齋戒是以改用次辛其有初四日上辛亦改用次辛者則因係

聖母皇太后祝釐初祉儀不容缺至明歲正月初四上辛並非
同年可比况冬至 南郊禮成有於次日受賀者所有明歲 祈
穀仍用上辛並著爲令可見 祈穀典禮我 聖祖 世宗 高
宗俱以應在立春以後得辛舉行爲是理應敬謹遵行嗣後每年
祈穀總以立春爲度如立春在本年臘月而上辛亦在年內未
便隔年舉行祭辛之禮自應改用次辛又立春係在年內而得辛
如在元旦及初二初三則歲除之日旣未便於城外宿 壇卽得
辛在正月初二初三等日而除夕亦係齋戒之期朕應住宿齋宮
於元旦應祭 堂子 奉先殿 壽皇殿及宮中拜 神之處亦
未便分詣行禮俱應改用次辛總之每年立春後得辛如在正月
初四日以後則當用上辛在初四日以前則當改用次辛設得辛
日期適遇正月初七日 世祖章皇帝忌辰則祇承之義統於一

尊不必因此而展 祈穀之期仍當於是日恭行致祭 壇上亦
仍照儀注作樂惟禮成回宮鹵簿大樂則設而不作至元旦朝賀
原屬臣下敬上儀文因值齋戒期內停止受賀以昭朕凝承 禮
祀之義於禮原屬無缺况 南郊禮成向有次日受賀之例此後
凡遇元旦齋戒其朝正典禮應於 祈穀次日補行著爲令○諭
軍機大臣等明亮奏張漢潮又從深林中前竄著那彥成松筠查
係田明亮恆瑞興肇三人內何人堵剿之一路突圍而出卽將此
路縱賊之人及帶兵將弁一面奏聞一面革職拏問所有張逆一
股著那彥成台布會同追剿朕此次查辦明亮等三人之罪並非
有意將從前帶兵大員盡行更換特因伊等負恩遷延歲月不得
不加以懲辦而那彥成松筠台布皆爲 皇考擢用之軍機大臣
亦並非朕藩邸故交驟加簡任以新聞舊也○革疏縱張漢潮之

參贊大臣都統明亮職賞副都統銜勦賊○奏未諭吏部議請將祖之望照徇庇例降三級調用一摺實屬咎所應得胡齊崙一案本係特交祖之望審辦祖之望既經查出底帳有餽送軍營各員情事若於彼時卽據實具奏方爲不負委任乃並不早行陳奏經倭什布再三開導始行交出祖之望雖因人數眾多案關重大其心究不免回護本應照部議降調惟念祖之望在湖北藩司任內於軍需總局支發各項尙無染指情弊此底帳旋卽送交倭什布處並未焚毀伊於到京日卽行陳明非始終欺隱者可比且聞其平日居官聲名尙好祖之望係刑部司員出身刑名素所諳悉著加恩以按察使降補○諭昨據倭什布奏到胡齊崙動用軍需底帳慶成永保俱經得受餽送銀兩因降旨將伊等家產查鈔今據布彥達賚盛住等將鈔出慶成永保家產開單呈覽本應照例入

官但念慶成之曾祖孫思克曾於國初著有助績爲本朝出力之臣又有公主下嫁伊家而慶成之祖五福亦曾任御前侍衛始終勤慎今慶成雖因帶兵不力得受餽送獲罪但念伊前此打仗曾經得傷此次未經上緊殺賊較之永保之有心逗遛安坐貽誤者有閒所有慶成祖遺住房一所及公主陪嫁坐落薊州等處地三十一頃六十畝五分四釐金冊一分俱著加恩賞還至慶成之父惟精並未獲咎其屋內什物亦著全行給還其餘鈔出房地金銀錢文衣物等項皆係軍需項下餽遺所得俱著交內務府等衙門照例辦理男婦人口發交該旗查辦所有大隆號繼繼鋪李文林借過銀一萬兩九江管關道阿林保借過銀四千兩及張星彩借過銀四百兩並著勒限嚴追至永保得受銀兩前據胡齊崙狡供畢沅送銀二千兩其餘六千兩係屬馬價今訊據永保家人伊昌

阿等供稱永保在刑部監禁後有沈姓送到銀八千兩此內有畢
沅幫銀二千兩胡齊崙送銀六千兩永保卽令伊姪出名將銀三
千兩買得住房一所其餘五千兩陸續用去等語是此項房屋係
永保將收受餽送銀兩所買自應入官至永保家人除借用者無
庸入官外其新興之九兒張氏二名著交該旗照例官賣其餘查
出祠堂祭田及伊子英智英華衣服什物俱著賞還○申禁直隸
漕糧積弊○賜賢良後裔故大學士朱軾曾孫生員晉麟知縣振
聲景華舉人○乙酉前據倭什布奏到胡齊崙動用軍需底帳鄂
輝得受餽送銀兩因降旨將伊家產查鈔今據傅森恭阿拉等將
鈔出鄂輝家產開單呈覽本應照例全數入官並查革世職惟念
鄂輝所得世襲男爵係在湖南軍營擒獲首逆加恩賞給其所受
餽送銀兩係在湖北之事所有前賞鄂輝男爵仍加恩賞伊長子

鄂彌善照舊承襲其次子少子所捐官職亦不必斥革鄂輝從前得受此項銀兩明知出自軍需因有人餽送佯爲不知竟收受至四千餘兩之多如鄂輝尙在必當計贓治罪今已身故免其深究所有單內開載住房一所取租房三百餘間地十頃餘畝及家人男婦十六名口俱著加恩賞還伊子鄂彌善等其銀錢朝珠玉器衣服等項自應入官著交該衙門照例辦理至伊子鄂彌善等衣服物件著傅森等分晰查明賞還○諭軍機大臣等昨據青海親王索諾木多爾濟等以近年生番屢搶游牧伊等逃避奎舒置之不問等情申報理藩院轉奏已將奎舒革職交松筠審訊矣茲閱奎舒所奏生番情形一摺奎舒惟怯無能僅遣熟番千戶等往擊首犯追索牲畜不思生番向無頭目地屬曠野何從追緝朕意於生番內設一頭目賞給六七品頂帶俾資彈壓嗣後再有搶掠之

事庶易辦理松筠駐藏多年諳悉外番情形著卽籌度辦理如另有所見不妨據實陳奏總期邊陲無事爲要又據奏照依索諾本多爾濟等所呈將托遜諾爾等處所設防範郭羅克卡倫移於蒙古游牧附近一節殊屬錯謬郭羅克近年以卡倫嚴密之故未曾搶掠今將卡倫撤回僅郭羅克乘閒搶掠何以禦之著傳諭松筠迅卽仍前設卡所有奎舒恆怯情節一併訊明具奏○以潘世思

李鈞簡俱爲內閣學士

潘世思由詹事李鈞簡由少詹事遷

冬十月丙戌朔封貝子奕純子載錫爲三等鎮國將軍賞頭品頂戴花翎○丁亥以直隸長新店地方鋪戶被劫革總督胡季堂太子太保花翎○戊子調書麟爲雲貴總督長麟爲閩浙總督以阮元署浙江巡撫由戶部左○己丑諭明亮勦辦張漢潮一股賊匪經年迄無成功業經降旨革去參贊大臣都統仍賞副都統銜予

以自效並命那彥成松筠確查明亮如有縱賊實據卽行嚴參治罪本日那彥成台布奏到審訊永保供詞據稱數月以來總未見明亮截住賊頭緊追賊尾無從與之夾擊且明亮咨送摺稟所奏打仗殺賊投出民人係交隨營知府趙洵審訊未見錄供稟報永保因令知府朱勳札詢據趙洵覆稱明亮因賊匪遁走日久不能不一奏塞責任情鋪敘所稱龍駒寨樂莊牧護關三次打仗殺賊俱屬烏有救出被掠百姓亦屬子虛並據差往軍營探信之外委張起鳳稟稱自五月至八月止明亮一路軍營惟前隊鄉勇等兩次會殺賊二十餘名官兵並未打仗一次等語閱之殊堪駭異明亮與永保素有嫌隙前因明亮參奏永保久駐大山岔一月有餘遷延觀望先經降旨將永保革職拏問旋據永保奏稱係明亮札令永保在彼駐紮見據永保呈出明亮來札雖尙須查究未可遽

以此仰永保逗留之罪但所稱明亮數月並未與賊接仗及謊報軍情各情節係得之知府趙洵及外委張起鳳稟報之語鑿鑿有據是明亮欺罔罪狀較之縱賊爲尤重朕辦理軍務宵旰勤勞於軍營奏摺批示不移晷刻若似明亮滿紙鋪敘全係虛詞天良業已喪盡尙安望其實心辦賊此而不嚴行懲治何以整飭戎行朕又將何以用人乎至興肇每次與明亮聯銜具摺乃於明亮種種欺飾之處扶同入奏罪亦難逭明亮興肇俱著革職拏問交與松筠嚴審定擬具奏○庚寅諭前因長新店有盜匪肆劫一案胡季堂路過該處接據稟報並不卽時具奏已降旨將該督宮銜革退並拔去花翎以示薄懲仍傳旨嚴行申飭胡季堂身任總督平日於地方營伍不能整飭一任廢弛致附近京畿盜匪逞兇肆劫咎實難辭早應自請嚴議迨接奉飭諭尤應慚悚請罪乃昨日奏到

之摺止係聲敘該處被劫情形及參列疏防文武員弁並無認罪之語今日覆奏申飭之摺僅以虛詞敷衍搪塞仍不自請交議豈該督竟視此案盜匪爲尋常事件耶見經江蘭長齡查明長新店汛兵五名是夜在汛者止有三名而西路捕盜兵丁四名是夜全未在彼巡緝長新店係附京要地人煙稠密爲商旅往來輻湊之區該汛兵丁旣少胡季堂早應籌議添設乃官兵止此數名尙有全不到汛者有到止過半者營伍廢弛莫此爲甚拱極營遊擊范建舉近在該處於被劫之次日並未卽時查辦並有離長新店三十餘里之麥石口把總馳往面告被劫之事范建舉仍置若罔聞轉以護送吉林兵丁爲詞前往良鄉一帶彼時吉林兵丁尙未入境該遊擊先期前往冀圖卸責亦由胡季堂平日遇事因循遂致營員毫無顧忌西路同知孟生章久已患病經朕早有聞知面詢

胡季堂尙奏其並無病證今則臥牀不起較前爲甚以近京緊要之區留此久病委頓之員戀棧貽誤皆胡季堂回護瞻徇所致除將遊擊范建舉同知孟生革職解京交軍機大臣會同刑部審訊外胡季堂著交部嚴加議處尋議照溺職例革職得旨著革去頂帶仍帶革職留任處分○壬辰調朱珪爲戶部尙書劉權之爲吏部尙書范建中爲左都御史由戶部尙書調○甲午以廣興爲內閣學士由左副都御史遷○丙申命二十七月內停閱冰嬉○丁酉諭胡齊倫身爲道員經手湖北襄陽軍需局四百一十九萬餘兩並不按例支發於奉文扣平之外復又私扣銀至二萬九千餘兩任情餽送其罪甚重因將胡齊崙革職拏解來京交軍機大臣會同刑部嚴行審訊並傳集人證質對今據審明屬實照侵盜錢糧入己數在一千兩以上例問擬斬監候洵屬法無可貸自勦辦教匪以來迄

今四載所費帑項多至七千餘萬賊匪滋擾始自湖北而軍營餽送之風亦始自湖北畢沅身爲總督公然提用軍需正項信任胡齊崙一人經理恣意侵扣實爲首先作俑如畢沅尙在朕必立賞重典也軍營帶兵大員如明亮永保等藉勦賊爲名稽延時日不願戡事其意以功成受賞卽加五等之封詔精自有定額不如常在軍營厚享餽賂一領兵過往聞而所得動至盈千累萬以養寇爲肥身之計以糜帑爲飽橐之資縱賊蔓延日久未滅皆由於此卽如畢沅餽送永保銀二千兩胡齊崙餽送永保銀六千兩一節伊等卽因永保在京監禁欲行伙助亦當各出己貲何得用國帑爲朋情耶試思此項銀兩皆兵丁等衣糧雇履之資今忽短餉八千則從征之士因茲而罹凍餒之患者不知其幾千人矣而欲令其踊躍戎行克敵致果其可得乎從征之士不能飽煖焉能破賊

以致賊害良民不可屈指其罪皆由於此等劣員所積也朕親政以來將軍營積弊屢次嚴飭禁止而伊等習爲故事仍恐相率效尤不得不再爲明白曉諭俾知儆懼見在四川軍餉已徹底查辦務使領兵各員無利可圖方能專心剿賊以冀速藏大功至胡齊崙爲此案罪魁今問擬斬監候覈其情罪明年秋審時必當予勾且業已動刑監禁一年之久或致病斃轉得倖逃顯戮然予以斬決在胡齊崙雖不足惜而於本律究有所加朕詳慎庶獄俱係按律辦理從不肯有意從嚴胡齊崙著卽處絞餘依議將此通諭中外並領兵大員及見辦軍需者知之○明亮奏殲斃首逆張漢潮出力員弁議敘有差賞兵丁一月錢糧○戊戌諭軍機大臣等前此陝省賊匪一被官兵偪剿卽向老林翻山逃匿看來老林大山實爲藏奸之藪此時賊氛已淨此等處所必當酌加清理適本日

召見彭元瑞奏及陝省終南山縣互八百餘里山內地界皆係岐山鳳翔武功盩厔郿咸甯長安藍田等九縣分段管理而山內地方遼闊居民稀少又子午谷一道向來本禁止行旅往來後畢沅因遞送金川文報改由子午谷行走取道便捷較之舊時驛路可近七八日之程開成通衢以致賊蹤得由此奔竄其山脊已閒有民人耕種此等地方既係山徑僻雜又延袤廣遠與其置之空閒徒爲盜藪何若酌爲疆理安置編氓且見在難民就撫之後無家可歸無地可種卽官給銀兩藉資口食止能贍給一時亦豈能久安生計若資糧用盡無以自存勢必故智復萌仍爲草竊之事朕意南山內既有可耕之地莫若將山內老林量加砍伐其地畝既可撥給流民自行墾種而所伐材木卽可作爲建蓋廬舍之用並察看山內地方形勢廣狹或分建縣治或設立廳署並安設營

汛移駐弁兵以資管束彈壓其官廨所需木植取給老林亦屬甚便且就撫之民又可傭工覓食亦以工代賑之一法從此作爲土著各安本業既有恆產必有恆心於招徠安撫及因地制宜之道豈不兩有裨益此卽倣明代原傑經理邯陽綏輯流民之遺意而小用之實善後所急宜籌及者松筠台布務須實心經理妥協籌辦況陝省前有撥發餉銀一百萬兩正可作爲一切善後事宜之用從前平定新疆拓地二萬餘里我皇考於一切善後事宜區畫盡美盡善是以數十年來相安無事松筠台布皆係素能體國愛民者於此事亦當籌畫萬全爲久安長治之計或伊二人酌量一人親往查勘明白會同商辦更可得有把握斷不可止圖目前急於完事仍致有名無實也○庚子 上自成福宮移居養心殿○命各督撫實力編查保甲○辛丑截留湖北漕米六萬石備軍

精○壬寅 上幸慶郡王永璘第○德楞泰剿除高家營賊匪生

擒首逆高均德高二等得旨獎賚封二等男授參贊大臣賞兵丁

一月錢糧○以范建中爲杭州將軍趙佑爲左都御史轉周興岱

爲吏部左侍郎調童鳳三爲吏部右侍郎汪承霈爲工部右侍郎

以祖之望爲刑部右侍郎候補按察使○癸卯諭朕莅紫光閣閱武進

士騎射路過 實錄館因念在館人員值此天氣漸寒朝夕纂辦

著加恩於例支柴炭外所有冬臘正三月每月賞銀五十兩以爲

燈火薪水之資在廣儲司庫內支領並著爲例○丁未諭本朝自

設立軍機處以來向無諸王在軍機處行走正月初間因軍機處

事務較繁是以暫令成親王永理入直辦事但究與國家定制未

符成親王永理著不必在軍機處行走見在軍機處大臣人少傳

森著仍在軍機處行走○賜李雲龍等六十四人武進士及第出

身有差○辛亥諭朕恭閱 皇考御極十年 諭旨曾令在京大
臣密保才守出眾之員以備擢用於延訪人材之中收兼聽並觀
之效朕躬攬庶政首重得人自當率循舊章舉行用資簡任著滿
漢大學士六部尙書侍郎及三品以上之都察院通政司大理寺
堂官於京外各員內有操守端潔才猷幹濟及平日居官事蹟可
據者各舉所知密行保奏不必急遽塞責不得稍有徇私濫舉充
數以副朕廣諮博採至意○命左右翼總兵官月輪一人於城外
駐半月率屬巡緝○以廣音布爲左副都御史由通政使遷○壬子諭
前因勒保自簡任經略以來安坐達州從未親自督兵惟將各路
軍營情形每隔旬餘彙報塞責遲延日久辦理毫無把握以致賊
匪東奔西竄官兵往來追剿迄無成功種種玩誤其罪甚重是以
特令魁倫馳往川省署理總督傳旨將勒保革職拏問另授額勒

登保爲經略大臣彼時並未將勒保家產查鈔者止因勒保尙無別項贓款嗣經湖北查出軍需底帳如明亮永保慶成鄂輝等俱經得受餽送提用餉銀先後降旨查鈔而勒保在川於軍需項下查無侵用入己實據是以至今總未籍其家產蓋查鈔之事原所以儆貪墨若身任大員贓私纍纍自當將其貲產入官以抵貪婪之罪如並無犯贓事蹟卽另有別項罪名亦止按例科其應得之罪不將家產查鈔此辦理之權衡非徇勒保也本日據魁倫審訊勒保供情定擬一摺朕詳加披閱如勒保並不留心體恤兵丁於喧鬧生事之滿兵不卽查明嚴辦又不將領隊之訥音劾參總兵德齡被賊戕害時不卽派兵將前往接濟明亮恆瑞不聽調度亦未據實參劾而於接到倭什布咨會有賊匪竄入楚境之事並不速行具奏傳詢之下勒保轉以恐煩聖心爲詞此四字尤爲內

外臣工通弊殊不知蒙混日久激成事端豈不更煩朕心耶此皆勒保昏愎造謾之罪今魁倫逐款審訊明確將勒保按律問擬斬決實屬罪所應得惟勒保自春開委任經略時朕曾有令其居中調度之旨彼時原以經略大臣惟在決機制勝不責以衝鋒陷陣之事初非令其安坐軍營不一親臨行陣也乃勒保昏愎糊塗錯會朕旨半載以來惟在達州附近地方紮營株守竟成一彙報軍情之員任闕寄者豈宜若此究念其係誤會前旨拘泥糊塗尚可稍從末減且勒保總統軍務以來所有首逆王三槐冷天祿冉文偉包正洪襲文玉等犯皆以次就獲雖非勒保親往督拏然究係伊所派調與有微功又前次勦辦貴州狎苗則係勒保之功一手辦竣曾蒙 皇考加恩錫以封爵自平定後至今狎苗安靜無事其功亦尙足錄斷不可泯勒保著從寬改爲應斬監候著魁倫接

奉此旨將朕格外施恩之處向勒保宣諭卽派委妥員將勒保解交刑部監禁並將辦理緣由通諭知之○命鄂輝撤出賢良祠

十一月戊午調恩明爲奉天府府尹以王秉韜爲河南布政使

由奉

天府府尹遷

○庚申恭建

高宗純皇帝聖德神功碑

上親製碑文

○壬戌實授吳璥江南河道總督○甲子諭額勒登保奏稱乾清門侍衛公安祿在王家山地方追賊於樹林內突遇賊出槍刺安祿落馬陣亡等語安祿係海蘭察之子海蘭察前在皇考時屢經宣力功績懋著今安祿甫至軍營卽能奮不顧身追賊陣亡海蘭察於九泉下亦當自喜有子然朕心深爲憫惻安祿所襲伊父海蘭察公爵著交該旗不必俟年終卽著承襲應得卹典該部察例具奏尋遣乾清門侍衛富翰及其弟安成往迎靈柩散秩大臣侍衛等往奠茶酒並賞銀一千兩治喪入祀昭忠祠嗣該旗奏安

祿新生一子賜名恩特赫默扎拉芬命襲公爵弟安成襲騎都尉
世職○諭本年朕親政之始聞松筠爲人尙能持正卽擢用陝甘
總督晉加宮銜乃伊數月以來辦理殊多錯謬卽如慶成係革職
拏問尙未定罪之人輒令帶領撤拉爾回兵前赴西鄉旣已檄調
一經奉到諭旨旋即撤回回兵素性驕悍因此心生疑畏別滋
弊端更復成何事體又如恆瑞本在甘境專辦藍號賊松筠令其
回陝致藍號賊乘閒他竄至今貽害本日據額勒登保奏遊擊阿
克東阿原在甘省追剿楊開甲等股賊匪經松筠飭回西鄉行抵
界牌遇賊陣亡是阿克東阿之死及楊開甲等之遺孽未盡實皆松
筠之咎其種種調度失宜殊負委任著先將太子少保及御前侍
衛革退拔去花翎用示薄懲仍留頂帶以觀後效並傳旨嚴行申
飭至那彥成係特派督兵剿賊之員前赴五郎一帶已覺稍遲於

軍務籌辦情形又未及早馳奏轉將終南山嶺谿澗敷衍聲敘尤不免存畏難之見見調盛京吉林兵陸續到陝正當乘其新到銳氣用以剿賊乃以盛京兵一千撥給柯藩是新到勁兵復以分而見單則追剿賊匪又將以兵少爲辭豈不蹈從前帶兵大員陋習耶那彥成著傳旨申飭○乙丑以獲近畿劫盜張標復胡季堂頂帶○丙寅諭向年恭遇 聖祖仁皇帝忌辰誕辰 皇考俱親詣奉先殿 壽皇殿行禮而於 世祖章皇帝忌辰誕辰則遣諸王輪流恭代蓋祀事常儀應有限制是以恭遇忌辰誕辰親詣行禮之處近逮 祖 考而 曾祖以上則遣諸王恭代具有等差本月十三日恭值 聖祖仁皇帝忌辰朕若親詣 奉先殿行禮則視 皇考恭遇 世祖章皇帝忌辰誕辰遣代之禮爲有過之朕不敢也至 壽皇殿則供奉 神御始自 聖祖與圓明園之

安佑宮相等密邇宮庭較之 奉先殿之崇祀 列聖者又有

不同每遇忌辰誕辰例皆陳設供器本月十三日 聖祖忌辰朕

自應親詣 壽皇殿行禮我世世子孫皆當永遠遵照遇 祖

考忌辰誕辰必親詣 奉先殿行禮至 曾祖以上則於 奉先

殿應遣恭代其 壽皇殿及圓明園之 安佑宮自 聖祖仁皇

帝以後萬世供奉每遇忌辰誕辰皆應躬親展敬所謂禮緣義起

者此也著將此旨傳諭近支諸王並交內務府大臣敬謹存記○

命科道官引見接連告假三次者照規避例題參○丁卯申命薦

舉賢員各大臣除所舉犯大奸惡者罪坐舉主外餘悉寬免毋顧

慮以致湮沒○戊辰予故兵部尙書公富銳祭葬諡恭恪○庚午

諭兵部議處護太原鎮印務參將富德降一級調用一本固屬按

例辦理但此案若係本任總兵徇庇屬員自應按例降調富德究

係參將暫護總兵未必不以官職與恩特赫默相等是以不行揭報若竟予降調與本任總兵無所區別富德著改爲降二級從寬留任嗣後遇有似此案件皆當分別本任護任照此辦理並著該部纂入例冊○增設步軍統領衙門郎中○免葉爾羌挑河回民次年額徵普爾錢十分之五○癸酉諭見屆長至 園丘大祀高宗純皇帝升配禮成後自應仰推 皇考恩慈用敷惠闔因思乾隆六十年以前各省積欠緩徵地丁耗羨及民欠籽種口糧漕糧銀兩並積欠緩徵民借米穀草束等項見在應徵者尙復不少著該部通行各省詳悉查明將以上各款自乾隆六十年以前普行豁免俾寰宇羣黎同沾 遺澤於乾隆年間逋欠銀米等項永免追呼用仰副 皇考六十年來子惠元元至意卽將此二條入於 升配恩詔款內○丙子命文職三品以下京堂官照團明園

例輸班奏事○丁丑額勒登保奏圍剿徐添德等股賊匪擒賊目
賈正舉等得旨嘉獎○撥部庫銀五十萬兩備河南軍需○戊寅
諭明亮永保等帶兵剿賊種種遲延玩誤捏飾謊報及得受餽送
各情節松筠所擬俱屬按律辦理除明亮永保俟解京後另降諭
旨外興肇本係糊塗無能其在軍營帶兵惟知隨同明亮枝梧蒙
混節次明亮所發奏摺或竟未與興肇閱看卽打仗處所亦未必
親到止係隨同列銜其罪較輕非因伊係宗室卽從未減興肇著
改發烏魯木齊效力贖罪交與興奎嚴加管束慶成從前帶兵曾
經受傷此次係自行屢請前往軍營且擊剿張漢潮時亦尙能跟
蹤追躡伊以受傷之人尙思出力情殊可憫而其從前在湖北軍
營剿辦賊匪彼時係永保總統景安在豫防守慶成止係帶兵協
同剿賊之人賊匪闖入豫境竄往陝西亦非貽誤慶成著改發伊

犁效力贖罪交與保甯嚴加管束○賞額勒登保銀一萬兩德楞
泰銀五千兩充軍賞○己卯諭前據賈鴻奏富綱在總漕任內有
得受衛弁銀兩之事曾經降旨令書麟詳悉查訊茲據書麟覆奏
富綱在任時有已故守備支秀發向眾告知在濟甯謁見富綱時
面向言及賄項甚多用度不敷似有欲令幫助之意屬令各備弁
量力餽送各備弁於稟見時富綱亦曾露用度不敷之語是以各
指銀一二百兩至三百餘兩不等俱交支秀發轉交富綱管門家
人劉姓接收等語富綱係漕運總督大員不知潔己奉公乃向所
屬備弁需索幫費約計書麟查奏清單富綱於江浙兩省備弁內
所得餽送已不下萬兩而江西湖廣豫東等省備弁有無餽送見
尙未經查出是富綱任意貪婪實爲卑鄙無恥富綱著革職拏問
交書麟嚴審定擬具奏並著查鈔家產以爲大員貪贖者戒○庚

辰冬至祀 天於 圓丘恭奉 高宗純皇帝配享頒詔天下覃
恩有差○諭前以 祈穀乃新春典禮自應在立春以後得辛舉
行明歲庚申正月初八日上辛應行 祈穀大祀係在立春以前
因致祭日期業於昨歲奏明 高宗純皇帝不敢改議是以降旨
仍照禮部等衙門原題日期行禮嗣後 祈穀大祀總以春後得
辛爲定本月二十六日 南郊大祀恭奉 皇考升配先期詣
壇齋宿宮內俱懸挂 皇考御製詩章扁額並陳設 御筆詩冊
朕自受璽後卽敬念 皇考精誠對越舉凡治法心法俱見之於
御製詩中朕每遇宿 壇必將 詩冊詩冊恭誦一周以昭虔
恪此次敬閱至乾隆己酉年 祈穀禮成述事詩內有今年九日
立新春 祈穀虔應值次辛之句因恭查詩注內載今歲正月初
九日立春若用初四日上辛 祈穀則尙在臘月內是以用十四

日次辛仰見 皇考聖意亦以 祈穀典禮應在立春以後得辛
舉行爲是明歲庚申 祈穀日期上年雖經禮部等衙門循例具
題惟敬憶 皇考嘗舉論語祭如在祭神如神在及吾不與祭如
不祭之言以 示訓自嘉慶元年以來 皇考傳位後凡遇 郊
壇大祀俱係朕恭詣行禮是以每次具題致祀日期本章俱令
送朕閱看明歲庚申上辛係在春前該衙門具題原係錯誤而朕
因是時適值 皇考聖躬不豫心緒焦切未經看出實朕之過惟
念事屬既往所有禮部太常寺及欽天監等衙門應得處分俱著
寬免其明歲庚申 祈穀典禮仍改用正月十八日次辛舉行○
撥部庫銀一百五十萬兩分備四川陝西軍需○壬午林鶴因病
解任調楊揆爲四川布政使廣厚爲甘肅布政使以邵洪爲江西
布政使阿林保爲江西按察使

由廣饒九
南道遷

○癸未邵家壩工合龍

頒 御書 河神廟扁額

十二月甲申朔諭本年春間國子監祭酒法式善條奏事件摺首
卽有親政維新之語試思朕以 皇考之心爲心以 皇考之政
爲政率循舊章恆恐不及有何維新之處至摺內稱勦辦教匪請
飭道親王重臣威望素著者一員授爲大將軍節制諸軍等語其
意不過見朕親政之初暫用儀親王永璘成親王永瑤管理部務
而成親王永瑤又在軍機處行走卽謂親王可用此非趨向風氣
乎國初可使王公領兵太平之時自不宜用若親王統兵有功無
以復加有罪將何以處議法傷天潢一脈之深恩議親廢朝廷之
法所奏已屬揣摩迎合全不顧國家政體又據稱口外西北一帶
地廣田肥八旗閒散戶丁情願耕種者許報官自往耕種等語若
如所奏豈非令京城一空尤爲荒謬之極至請申明定限舉行廢

生孝廉方正博學鴻詞各條其事俱近沾名惟停止督撫罰交養廉其說近是早經有旨通諭其所稱尹壯圖業經召用鄭澂亦令吏部調取引見朕原不以人廢言也至從前法式善在祭酒任內聲名狼藉其最著者開館取供事一事賊私累累此人朕素不識然早聞其劣蹟矣今春本欲明發此旨恐人誤會不敢陳言原欲留伊俟京察時再行宜露罷斥近令諸臣密保深知之人於十一月十八日豐紳濟倫密保法式善謂明白結實辦事妥協實屬孟浪可笑豐紳濟倫與法式善並非同衙門辦事之人如何得知其妥協必係法式善見朕用豐紳濟倫管理之處頗多妄生別念仍如鑽營和珅福長安故智夤緣干求彼時卽欲將豐紳濟倫法式善交軍機大臣共問其故又慮無人復敢保薦權將法式善之名一併寫出姑試廷臣有人論奏否今已等待一旬有餘無人論伊

劣蹟在法式善之悖謬條奏諸臣容或不知其國子監之聲名諸臣不知其誰欺乎君臣之義雖分隔堂廉但辦理國家事務於用人行政是非得失自應同心協力共襄治理方合元首股肱之道卽朕特經簡用之人如有不孚眾望者諸臣尙應據實執奏何況法式善止係廷臣保奏之人既有劣蹟豈得緘默不語若知而不言又豈純臣之居心乎今法式善之名次已應召見若再不宜露恐諸臣視朕爲無知識之庸主任人簸弄矣法式善著卽解任派大學士軍機大臣會同訊問並將豐紳濟倫何以率行保舉之處一併詢問明白分別定擬具奏此旨著發交儀親王永璇成親王永理滿漢六部堂官閱看仍令覆奏其法式善有無劣蹟並著國子監堂官明白回奏將此通諭知之○乙酉諭前此降旨令在京大臣等於京外人員就其平日所知者各行密保原欲大臣等擇

其才守優長並有實蹟可據堪資簡擢者舉以入告用收得人之效乃豐紳濟倫並未深知法式善平日聲名才具竟以在伊家教讀從未向伊借貸一節卽以其爲人體面遂登薦牘實屬孟浪本應交部嚴議姑念其甫經辦理部務年輕未曾厯練且詢明尙無請託私弊豐紳濟倫著從寬交部議處又論法式善所論旗人出外屯田一節是其大咎至於命親王領兵一節不過迎合揣度而國子監一事已屬既往姑不深究若照議革職轉恐阻言路殊有關繫加恩賞給編修在 實錄館效力行走○丁亥賜故琉球國中山王尙穆祭一次絹五十匹○庚寅邵家壩工復鰲○王辰諭向來有漕省分徵收漕糧州縣以濟運爲名多方浮收最爲民困是以降旨清釐漕政剔除積弊仍慮運丁兌費不敷令有漕省分各督撫確查妥議酌給津貼並降恩旨令旗丁多帶土宜二十四

石免其上稅原期地方漕務兩有裨益乃蔣兆奎前有每石增收一斗作爲運費之奏事屬加賦斷不可行蔣兆奎以所奏未允並不將運費實在不敷之處悉心籌議詳晰具奏輒忿激求去效明季挂冠之狀經降旨飭諭蔣兆奎又議借項幫給運丁並以物價昂貴今非昔比爲言試思借項一事不過暫濟目前而遞年坐扣於丁力豈不更形竭蹶若謂時值物價較昂則又不獨旗丁爲然如各官俸廉兵丁糧餉槩因物貴議加有是理乎而蔣兆奎總以運費不敷爲詞頻頻演奏又不妥籌辦法受衛員愚弄其意總在加賦借帑始終堅持己見執拗不回本日覆奏之摺竟稱旗丁經費應得之項委不敷用並以岳起所議各船領運銀四百五十餘兩亦止係就蘇州太倉等衛約計其餘若揚徐二衛所屬各幫領銀在百兩以內者經費不敷更多並非受衛員愚弄且稱閩浙督

臣書麟議奏津貼旗丁每船八十餘兩猶有不敷造船之費仍須另籌伊未必受衛員愚弄等語若如所奏是清理清務之事竟不可行况津貼兌費原視道路遠近酌定多寡其路近省分領銀自少今蔣兆奎竟不分別各省遠近槩行率混入奏而又將造船之費一併列入且卽以書麟所奏津貼而論亦不至如蔣兆奎之多乃蔣兆奎藉以唐突其執謬之見尤甚於前看來蔣兆奎難勝漕督之任所有漕運總督員缺卽著鐵保補授蔣兆奎仍暫留該處俟費瀆鐵保查辦完竣後再降諭旨○癸巳調祿康爲吏部右侍郎轉德瑛爲刑部左侍郎以琅玕爲刑部右侍郎由古城領隊大臣遷○甲午諭前因福甯在旗鼓寨剿賊時曾殺降人三千謬報平賊一股因降旨令該督等據實查奏茲據魁倫奏前此福甯辦理此案係副將呂朝龍經手當卽調到面加詢問據稱嘉慶元年七月間官

兵已攻破旗鼓寨餘匪竄至謝家營無路奔逃俱跪地乞降福甯允准該匪等卽行投出男婦老幼約有三千餘人一併帶至龍山縣城外分紮福甯以該犯等係臨陣窮蹙始降非豫先投出者可比因將女犯及老幼釋放外假意受降將其餘男犯誘以帶同打仗進城給與號褂口糧於夜間陸續殺死約計共有二千餘人等語是福甯前此勦辦旗鼓寨竟係殺戮降人至二千餘名之多殘忍已極各路軍營勦辦教匪其中被賊逼脅良民甚多本年節經降旨令領兵大員勦撫兼施如有臨陣投出者卽當分別省釋妥爲安撫剴切諄諭不啻至再至三而宣諭以後投出者人數寥寥自因招撫之法未得其道今福甯於旗鼓寨攻破後其附從夥黨旣經跪地乞降男婦相率投出自應分別收恤以示招徠乃轉誘令入城使之駢首就戮且誅及二千餘名似此旣降復殺賊匪紛

紛傳播則被賊裹脅之人自知投出仍不免於一死又焉敢束身歸命是驅之從賊無怪乎安心不降賊匪亦人何殘忍若斯之甚秦白起阬降猶因敵國今則四海一家自相殘賊若此朕心實有不忍見在訊據拏獲之賊首高均德亦供稱賊匪夥黨總懼投後仍遭誅戮是以觀望不前可見福甯前此所辦錯謬已極適以堅賊黨從逆之心試思賊犯抗拒官兵其臨陣殲戮者原難細爲區別設投誠後果有心懷反側復思蠢動之徒亦應嚴辦示懲若已畏罪乞命允彼投降無論本係被脅民人情原可憫卽實係邪教而能棄械投出亦當貸其一死量爲安插卽閩粵等省海洋巨盜有能改悔投首如從前之張表林發枝等一經該督撫等據情陳奏高宗純皇帝俱宥其既往予以自新賞給頂帶並令送京分發香山一體當差而近日投出之洋匪黃文海亦經朕加恩賞給

外委頂帶發往陝省軍營隨同官兵打仗自效此等多係內地民人在洋疊劫之犯尙且念其能知改悔加之恩宥至於學習邪教雖有干明禁然苟不至勾結作亂亦何常卽予嚴辦况臨陣投出之人旣知去逆效順卽與平民無異豈有無分玉石概予駢誅並用言哄誘入城濫戕生命旣示人以不信復阻其來歸是賊匪至今投出者少皆由福甯辦理此事失人心而傷天理所致其罪甚重福甯業經革職著魁倫卽將伊拏問令與呂朝龍質證明確按殺降律定擬具奏並著通諭各路領兵大員嗣後勦辦賊匪如有臨陣乞降及從賊營自行投出者卽屬畏法之人總不必究其既往之罪皆當准其自新交地方官妥爲安頓俾得從附和之徒皆知得有生路相率歸誠於勦撫大局庶有裨益至呂朝龍係福甯使令殺降非伊之罪於質訊明確後卽令速回本營效力再本日

召見惠齡據奏從前教匪在荆襄滋事屢經官兵勦辦僅餘二千餘人彼時景安任河南巡撫在南陽一帶駐守不肯實力防範協同勦捕致賊匪闖入豫境到處焚掠景安相距數十里並不發一兵應援以致賊匪直從武關奔竄陝省人數又復眾多鴟張日甚景安惟於無賊處躲避及賊去已遠始行尾隨遙送合省官民無不恨其縱賊且笑其怯懦若使景安早能實力防堵協同領兵大員會合夾擊保障全豫早可勦辦爭盡何至延及此時尙未竣事是數年來賊匪蔓延數省糜費國帑八千餘萬焚毀民田廬舍不知凡幾赤子之橫遭鋒鏑者又不知凡幾實皆景安畏怯無能養癰貽患所致卽辦理浙川一案亦係完顏岱等早經辦妥景安攘爲己功據以入奏得邀伯爵之封是景安旣懼怯縱寇又復飾奏冒功其罪實無可貸若僅予革職發往伊犁轉得令其在彼安坐

置身事外何足以爲封疆大臣縱賊殃民者戒著傳諭保甯卽將
景安鎖拏派委妥幹員弁迅卽押解來京交部另行審擬具奏總
之各路軍營擊剿賊匪與扼要防堵同爲一事其剿賊之人固應
直前奮擊然必前路堵禦嚴密使賊匪無從奔竄方可併力邀擊
制其死命而前有堵禦亦必有追兵緊躡其後方成合剿之勢若
有勦而無堵則東奔西逐徒致疲乏兵丁豈能得力儻防禦雖嚴
而追剿官兵總落賊後如近日楚省邊界雖經倭什布分段嚴防
而提督七十五在途逗留復致賊匪乘虛折竄又安望其一鼓撲
滅已降諭旨令經略額勒登保查明參奏此乃數年以來軍營通
病額勒登保及各路統兵大臣並在本境防堵之各督撫等務須
同心協力大加振作以期剋日蕪事將此通諭知之○乙未諭軍
機大臣等額勒登保奏此次在毛耳亞青子亞地方打仗傷損得

力官兵自揣無能請另簡有福大臣以充經略等語額勒登保數年來宣力戎行勦猷懋著故特加恩授爲經略大臣俾其盡心勦辦克奏膚功至疆場勝負乃事之常從前軍營遇有折挫往往匿不以聞今額勒登保據實入告朕方軫念不暇豈肯加以斥責東三省之人勇者固多然忠勇端潔實力體國似額勒登保者頗少額勒登保卽係朕之福將其所請另派大臣殊屬非是前調黑龍江兵一千名嗣因額勒登保等奏賊勢窮蹙始行停止今賊眾仍復抵死抗拒額勒登保可卽熟籌見在情形如須加添兵力不妨卽行調取毋以糜費爲慮額勒登保務須仰感 皇考及朕簡畀之恩整飭戎行相機進剿亦不可不顧國家大體輕身涉險將此密諭知之○以德文爲內閣學士_{由詹事退}○丙申額勒登保奏生擒首逆王登廷得旨獎賚○丁酉賞還原任湖廣總督畢沅鈔產內

墳塋山田祠堂家廟並附近墳塋餘地及祭田三分之一○戊戌
諭昨候補知府那英押解教匪首逆高均德及高成傑到京據稱
高均德在途心懷畏懼不肯飲食經伊等用言哄誘告以到京必
可邀恩釋放仍令同至川陝隨同官兵打仗高均德聞而欣喜並
於沿途驛站索銀積至五百餘兩零星給與擡夫並稱存積銀兩
擬於釋回赴軍營時作爲犒需等語高均德身犯大逆重罪一聞
解官哄誘之言卽深信不疑冥頑已極在地方官慮其不食餓斃
干係處分給與銀兩尙無不合但高均德竟不知所犯係必死之
罪亦可謂下愚不移矣因思愚賤之民敢於聚眾謀逆罪由自取
而揆其罔知法度之由則係地方官平日不能化導所致各省地
方有司每逢朔望有傳集民人宣講 聖諭廣訓之事如果膺民
牧者能教以大義於國家設立科條摘其大端剴切宣示俾聞聽

之民知所領悟則不但馴謹善良聞而忻慕卽桀驚不馴之徒亦當知所斂戢今高均德係倡亂首逆屢抗官兵伊卽毫無知識豈於謀反叛逆萬無可赦之條亦竟不知乃於拏解在途竟作倖生之想在此等悖亂之徒同於禽獸原無足惜而覈此情節其愚鈍無知轉覺可憫政治以教化爲先如論語所云道德齊禮有心且格固難驟期其效但地方大小官員有教育斯民之責豈可視爲迂闊置之不講嗣後不但朔望宜讀 聖諭廣訓當明切講諭卽公堂聽獄赴鄉勸農時皆可隨時誨導啓發籲蒙庶默化潛消可漸收易俗移風之效毋得視爲具文虛應故事特此通諭各督撫督率所屬實意奉行於化民成俗之道朕實有厚望焉○諭胡季堂奏審擬行劫長新店鋪戶之盜犯翟禿子卽翟成子等於審明後恭請王命卽行正法一摺翟禿子係張標寨內匪黨結夥行劫

自屬法所難宥但該犯於張標等行劫時係在村外看守馬驢所劫贓物各犯分開攜帶後翟禿子回至內黃因張標先已潛逃未經俵分覈其情節較之首犯有閒本應歸入情有可原分別辦理胡季堂將該犯卽行斬梟所辦已覺稍重但翟禿子究係在長新店畿輔近地人煙稠密之區連劫鋪戶今已將該犯正法尙係爲附京重地起見至該督所奏直省見獲續獲之犯一經訊明如係張標夥黨但經行強劫奪無論曾否入室搜贓槩擬斬決卽行劫一次在外把風接贓者俱不准以情有可原聲請等語殊屬非是向來辦理盜案例分法所難宥情有可原察覈定擬原於懲創之中仍寓矜恤之意豈有並不覈其所犯情罪無分首從一律置之重典若如該督所奏無論曾否入室接贓及在外把風接贓者俱不准以情有可原聲請則是罪有重輕法無區別若尋常偷竊小

賊更非劫盜可比乃因其曾在張標寨內居住亦不分首從照積
匪猾賊辦理豈得爲情法之平平胡季堂久任刑名素諳律例於
劫盜重案自應執法嚴辦以期無枉無縱乃該督於應拏巨盜始
而疲玩不前以致釀成重案及經朕節次嚴飭於獲犯後又意存
迎合輒以嚴刑峻法思掩其平日廢弛之咎大臣實心任事者不
應如此所有張標寨內續獲各犯於解到審明後俱著胡季堂準
酌情罪按照律例分別定擬不得有意加重以刻爲能○辛丑姜
晟奏擒斬苗匪首惡吳陳受餘苗安靜回寨得旨嘉獎加太子少
保仍下部議敘○壬寅諭軍機大臣等近因那彥成按捕竄匪帶
兵深入老林而兵力爲地險所限技無所施正在降旨諭示適據
那彥成等奏到各路剿賊情形據稱賊蹤奔竄不出老林密樹遮
蔽十丈以外卽不能見又天氣苦寒積雪數尺勢不能放火燒焚

將賊轟出那彥成等實爲辛苦萬狀不忍披覽該處老林據稱南北百餘里至二百里不等但究與何省及何府州縣毗連路徑從何出入仍未詳悉奏明如果深林密菁縣延不斷則那彥成帶兵深入之後糧運如何接濟且人皆步行又如何安設營盤若官兵皆係露處亦從無此行軍之法那彥成自當察看地勢多方籌畫用間誘之使出以便乘機邀擊或於要隘處所嚴行堵截諒此深山老林未必有地可種賊匪在內無從得食自必窮而思出官兵以逸待勞方可制其死命且那彥成見在兵力不爲不厚焉有萬餘生力精兵合之鄉勇數萬僅在老林追逐曠日持久辦此一二千殘敗賊匪之理那彥成必當亟思改圖上緊相機勦辦務於明年二三月內奏績歲功斷不可惟事跟追致稽時日○乙巳諭軍機大臣等富綱奏官兵克復霧龍山等處村寨及酌籌分兵進勦

情形一摺覽奏俱悉已於摺內批示猺黑等在霧龍山屯聚經官兵進剿賊匪退入深林將各處草房自行燒毀富綱摺內既稱殲斃賊人無數而割獲首級何以僅止十餘顆奏報不實卽此可見此次猺黑滋事之初若差令明幹員弁前往該處曉以利害令猺黑頭人將滋事爲首之犯如和尙銅登等縛獻正法原可就事完事卽如姜晟辦理湖南苗匪一事未曾打仗止係傳集苗弁詳悉開導卽將首犯吳陳受擒縛餘苗俱安靜回寨猺黑之事何難照此辦理乃烏大經率行帶兵往捕而富綱亦紛紛調遣多兵以致猺黑肆行抗拒不能解散且總漕任內得受餽送銀兩獲罪有所風聞故將猺黑一案張大其事希冀將功抵罪亦未可定此時旣已用兵事難中止前已降旨令耆麟前往威遠督辦該督到彼後務當酌量情形若猺黑見大兵雲集震懾軍威不敢仍前抗拒書

麟卽可趁其畏懼之時勒令將滋事首犯縛獻正法其所占土司
猛猛地方槩行退出不敢再犯邊界卽可完案原不必深入窮追
盡殲醜類也至窩網摺內所稱土司西北未從獯匪之村寨可以
派練從征繞出賊營之後以圖恢復及另片奏將來官兵進至猛
猛城其後路俱係西北土司地方毫無顧慮等語談何容易行軍
後路關繫緊要並閱所進圖內由打雀山至猛猛城道路縣長何
能繞出賊營之後且此等土司所屬番民反覆靡常或爲獯黑勾
結聽其指使豈可深信焉有防備官兵後路全仗土司之理書麟
於此一節亦當留心妥辦不可稍存大意○丁未諭本日召見顏
檢將雲南抱母恩耕等井被水一事詳悉詢問據稱嘉慶元年六
月內因雨水稍多山水驟發以致二井咸被衝淹雖人口未有損
傷而鹽塊多有浸失衙署房間亦多衝塌當經稟請勘辦巡撫江

蘭以雲南向不辦災遂謂被水不重未經特行具奏並將撫恤銀兩不准開銷辦理過刻等語雲南雖係邊遠省分而地方民瘼總屬一體抱母恩耕二井既經被水衝淹自應據實查明妥爲經理何得以該省向不辦災爲詞隱匿不辦卽云該處並未損傷人口但彼時竈戶不能照常煎鹽因未經報災致有鹽欠在井官已不免追賠而竈戶等尤爲苦累是江蘭諱飾之咎實所難辭著交部嚴加議處以爲封疆大吏玩視災務者戒○諭朕恭閱 皇考前降 諭旨曾將打牲烏拉東珠自乾隆四十六年至五十一年停採五年至今又經十五年不惟每歲勞苦採撈人等又復多傷物命朕仰體 皇考好生至仁其打牲烏拉採珠河著自明年起停採三年以資長養俟三年滿後由該將軍等再行具奏請旨當此停歇之際交吉林黑龍江將軍等於水陸隘口安設卡倫嚴行查

率偷採之人此朕憐惜物命並非珍愛其珠也勿得仍任偷採負朕愛物之至意○庚戌諭督撫職任封圻政務殷繁不得不延請幕友以資助理近聞各省督撫多有挑取屬員入幕之事因其處明例案便於任使是以多留在幕謹飭者或無影射滋弊而一二蒼滑之輩藉與同寅交好暗通關節私相結納到處招搖逢人攬騙司道資其通信府州藉以逢迎每遇升遷輒出具上考既擁厚貲復邀遷擢且此等人員既經常在督撫署中於本任應辦事件必多貽誤於吏治官方實有關礙嗣後各督撫等不得將所屬人員留入署中致滋弊端其延請署中幕友亦毋許出外與地方官交結往來如敢仍前私自留用屬員別經發覺或被科道糾參必將各該督撫及留入署中之員一併治罪決不寬貸○是歲朝鮮暹羅來貢○會計天下民穀數各省通共大小男婦二萬九千三

百二十八萬三千一百七十九名口各省通共存倉米穀三千一百三十八萬七百九十九石二斗七升九合四勺